



# Khutba Jummah

HAZRAT MUHYI-UD-DIN AL-KHALIFATULLAH

*Munir Ahmad Azim*

08 Janvier 2016 ~  
(27 Rabi'ul Awwal 1437 Hijri)

**(Résumé Khutba)**

**Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hazrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite axé so Khutba Jummah lors «Bondié encore Causé et Guidé »:**

## **BONDIÉ ENCORE CAUSÉ ET GUIDÉ**

Si Bondié (Allah) ti pé cause avec So bane serviteurs dans le passé, alors ki faire Li pas cause avec zot azordi aussi ? Si Li ti ena l'habitude pou envoye So guidance dans bane moments cruciale kot ena bane problèmes, bane doutes et l'égarement, alors ki faire Li pas ouvert pour bane dimounes la porte de So guidance aujourd'hui ? Eski sa veut dire ki tous bane religions fine corrompu et ki nous pas capave trouve la moindre vérité là-dans, de sorte ki nous pas capave gagne aucaine résultat en suivant ene de sa bane religions là; ou eski li possible ki vraie la religion exister lor la terre, mais ki bane dimounes népli pé suivre so bane l'enseignements et alors par conséquent népli capave faire aucaine progrès dans le domaine spirituel?

Quelle que soit l'opinion ki nous ena, nous (l'homme/ l'humanité en générale) pou pose toujours la question suivante: Ki faire Bondié pas fine révèle ene nouvo religion si Li ti pensé ki le monde ena ene grand besoin de sa ; et si Li ti fini donne So guidance pour ki dimounes capave suivre sa, mais ki malgré sa bane dimounes pas prend sa compte, alors ki faire Li pas élève ene réformateur pour guide zot lor le droit chemin afin ki zot capave jouir de So proximité et de sa façon là réalise le but de zot création?

Li difficile pou croire ki ene Dieu ki ena Pitié et ki content So bane créatures pou reste sans rien faire kan Li trouve l'humanité pé prend chemin l'égarement et pé pli plonzé dans bane zaffaires

mondaines ; li bien difficile pou croire ki Li pas pou faire nannié pou guide l'humanité et montrer li le droit chemin à suivre. Bondié Li bizin ene Être ki pli aimable et pli clément ki ene papa ou ene mama, parski ene papa ou ene mama zot nek bane l'instruments de la procréation de l'enfant, mais Allah Li non seulement le créateur, mais aussi le but ultime de l'existence humaine.

Le rapport entre ene zenfant et so bane parents li temporaire, mais entre l'homme et Allah, sa relation ki ena là li pou duré pou toujours. Bane facultés et bane ressources de bane parents zot limité et pou fini ene zour, mais la puissance d'Allah pas ena aucaine limite et So bane trésors zot inépuizable. Celui ki ena ene tel rapport avec So bane créatures et ki Li le Maître ki possède bane tels pouvoirs pas pou capave oublier So bane créatures et reste indifférent à zot bane souffrances. Celui ki demande à So bane créatures ki faibles pou faire preuve d'indulgence envers bane les autres pas pou capave Li-même montrer Li sans pitié à tel point ki Li abandonne l'humanité sans aucaine moyen de direction et de progrès spirituels et ki Li laisse li alle vers so l'égarement dans bane ténèbres et laisse li perdi so la vue kan li pé rode cherche la lumière.

Si ena ene Bondié, alors Li pas pou capave permette sa ! Si Li sympathise avec So bane serviteurs dans zot bane épreuves et toutefois Li pas donne zot bane moyens de sauvegarde (de protection), alors nous pou bizin conclure ki, soit Li pas ena pouvoir pour guide l'humanité vers la vérité, ou ki sa, c'est pas le but de l'existence de l'homme pou rentre en communication avec Allah, et ki l'homme fine crée seulement pou manger, boire, et vive ene l'existence purement matérielle et animale. Mais tous sa bane alternatives (et suppositions là) zot insupportables (nous pas capave pensé même sa, ki Allah pou capave faire sa !). Li ridicule pou imaginer ki Celui ki fine crée l'univers pas ena puissance pour fourni bane moyens pour la direction spirituelle de l'humanité. Nous pas pou capave non plus imaginer ki l'homme fine crée seulement dans le but pou vive seulement ene l'existence matérielle, parski, dans ce cas, nous pou oblize admettre ki ene Créateur Qui Parfaitement Sage et Qui Possède tous bane Connaissances fine donne naissance à sa grand l'univers là sans aucaine but. Ene machine li pas inventé dans le simple but ki li roulé par li-même; sak machine ena ene but précis.

Si le but de l'existence de l'homme li seulement pou manger, boire et dormi, sa pou veut dire ki l'homme fine crée pour vive seulement dans l'aizance, et à so manière. Si l'homme pas ena aucaine but dans so création, alors nous pas capave considère l'aide mutuelle couma le but de la vie. Nous obligé conclure ki bizin ena dans le monde ene religion ki pou capave conduire l'homme vers Allah. Si tous bane la religions ki existé zot corrompu, ene nouvo religion bizin révélé pour la direction de l'humanité (en l'occurrence l'ISLAM); et si ene tel religion déjà existé dans le monde ki pou capave conduire l'homme vers Allah et ki pas pé capave accomplir so but parski l'homme pas pé prend li compte, alors ene réformateur bizin vini (de la part d'Allah) pour dirige l'attention de l'homme et ramène l'humanité vers sa vrai religion là (l'ISLAM).

Eski ene dimoune li bâtir ene zoli la caze et meublé li dans le luxe, pour ensuite néglige li sans li faire aucaine réparations et li laisse li alle en ruine ? Ou, eski ene dimoune plante ene zoli jardin et ensuite laisse li alle sec faute d'ene système d'irrigation ? Alors si pour tout sa, li pas possible ki l'homme arriver faire ene zaffaire coumsa, alors couma eski nous capave penser ki Allah,

après ki Li fine révèle ene religion parfait pour le salut de bane dimounes, fine capave oublier pou prend bane mesures pour protéze et préserve li ? Eski nous pas trouver ki après Moussa (as) Allah fine envoie bane prophètes ene après l'autre pour maintenir en vie la religion Juif et accomplir le but pour lequel sa religion là ti révélé ? Et ki après Jésus (as) Li ti choisir bane ki ti garde vivant l'esprit de Christianisme (vrai Christianisme) ?

Et ki après la révélation de bane Védas Li fine envoie Krishna et Ram Chandra (as), et bane les autres dimounes saints pour renforcer bane l'enseignements véridiques (de bane Védas)? Et ki après Zoroastre Li fine faire provision pour la préservation de la religion Persane? (Saki mo pé causé c'est bane l'enseignements véridiques ki tous sa bane religions là ti représenter). Et ki après Hazrat Muhammad (saws) Li fine élève continuellement bane dimounes ki fine vini pou explique bane l'enseignements de l'Islam avec l'aide de la révélation et aussi pou maintenir li en vie ?

En ene mot, de n'importe ki l'angle ki nous examine la question, nous obligé arrive à la conclusion ki la condition actuelle de la terre réclame à haut et fort ene guide ki divinement inspiré et non pas ene guide ki élu par bane z'hommes (à travers ene élection bien restreint). Le monde ti grand besoin ene Messenger de Dieu, ene réformateur de l'Islam et de l'humanité entière ki pou vini pou mette ene stoppe à bane dynasties familiales ki fine prend en main le commandement et fine piétine de sa façon là la loi Divine. Par exemple, nous trouver dans sa l'époque là couma ene dimoune pé exerce so l'autorité lor le plan mondial pour autoproclame li-même *Ummati Nabi* et *Mujaddid* et *Khalifa de l'Islam* sans ki li fine même recevoir de Allah la guidance, et bane instructions pou proclame au monde ki li ene « *Ummati-Nabi* ».

Si ou vraiment ene chercheur de vérité, Ô mo bane camarades, alors vine cherche le guide divinement inspiré de zot l'époque, ki recevoir le *Rouh'ul Quddouss* (le Saint Esprit). Et ki l'âmes de bane dimounes zot vine couma bane amoureux fous, kot zot tourne zot lizié vers les ciels avec ene grand désire dans zot lé cœurs, et kot zot implore zot Créateur avec douleur et tristesse, et lizié rempli avec larmes, pou ki Li ena pitié de zot et ouvert pou zot bane la portes de So Miséricorde et de So Grace, et accorde zot saki Li fine accordé à bane ki ti vine avant zot, et ki kan Li (Allah) pou enlève bane ténèbres spirituelles de zot, zot lizié pou guéri (zot pou trouve claire) et zot lé cœurs aussi pou guéri (kot tout bane impuretés pou disparaite) et pou ki Allah guide zot vers la vie éternelle kot sa c'est vraiment le but de l'existence de l'homme.

En sa siècle présent de Manifestation Divine là, le Jamaat Ul Sahih Al Islam li seule Jamaat sous la bannière de l'ISLAM, la religion divine qui trouve li sous la protection Divine. Ô ou ki soif de la vie spirituelle, vine sous l'ombre de la protection Divine. Mo donne zot bane bons nouvelles ki le Jamaat Ul Sahih Al Islam pou subvenir à zot plus grand besoin (spirituelle).

Celui qui donne la vie spirituelle à bane morts (cadavres), ki donne la vue spirituelle à bane aveugles, le pouvoir spirituelle pou tendé à bane sourds, etc., c'est sa même guérisseur spirituel là ki fine vini de la part d'Allah selon bane besoins du temps et selon l'accomplissement de bane prédictions/ prophécies de nous bien-aimé prophète, Hazrat Muhammad (saws).

Abu Huraira (ra) fine rapporté ki le Saint Prophète (pssl) fine dire : «*En vérité, Allah pou envoye au début de sak siècle ene dimoune pou faire revive la religion (al mujaddid).*» (Abou Dawud)

Et aussi ena bane prophécies du Messie Promis Hazrat Mirza Ghulam Ahmad (as) et celui de Mousleh Maoud Hazrat Mirza Bashiruddin Mahmood Ahmad (ra). Bane élus d'Allah pas couma bane élus de l'homme. Bane élus d'Allah zot vine toujours de la part d'Allah avec le Saint Esprit (*Rouh'il Qouddouss*) afin pou sauve le monde de bane ténèbres du péché et pou guide li vers le salut. Ecoutez, Ô bane dimounes, l'Islam c'est seule la religion ki Allah (Bondié) fine promette pou préserver, et c'est ene vérité sa ki Li pé toujours protège li, et c'est, par conséquent, seule la religion ki Allah fine choisir, et c'est en vérité le **SAHIH AL ISLAM** ki sa Jamaat ki sorti de la racine même de l'ISLAM ki pou apporte dans nous l'époque la guidance tant attendue pour toute l'humanité. Si sa pas coumsa, alors ki faire Allah fine bizin donne bane moyens pou protège et préserve l'Islam, et laisse bane les autres religions sans défense et sans protection?

Donc, Ô ou bane chercheurs de vérité ! Plusieurs fois mo fine dire zot dans le passé ki mo pas fine vini pou apporte ene nouvo religion, mais Allah fine envoye moi pour faire revive bane vrais l'enseignements de l'Islam, pour servir l'Islam, pour faire li revive et propage li partout, et pour conduire l'humanité vers Allah à travers l'ISLAM. *Insha-Allah* ki Allah (twa) dirige zot par zot sincérité de cœur vers sa vérité là. *Ameen*.